

四庫全書

集部

欽定四庫全書

強齋集卷四

明 殷奎 撰

行狀

述附

元奉議大夫常州路宜興州知州盧公行狀

公諱僧孺字希文號定齋姓盧氏其先范陽人更五代以來世居鄭之河陰金人入汴始遷滑之胙城五世祖鈞生鉛鉛生連元初為燕京等路萬戶府與魯總管贈

亞中大夫東昌路總管追封范陽郡侯郡侯前仕開州  
卒墓城北黃斌之原野齋李謙為文其碑生通奉大夫  
河南行省參知政事范陽文昭公諱克柔瓠山王構銘  
其德於墓文昭生翰林待制諱亘正議大夫衛輝路總  
管諱景衛輝之卒金華王潛狀其行再世皆返墓開州  
今為開州濮陽人公即衛輝長子也母夫人劉氏生公  
四十日而卒祖母太夫人李氏躬自鞠育稍長入國子  
監為生員讀書積學才器早成始冠衛輝府君命公以

嫡孫承文昭公蔭朝廷以公勲臣之後不復任以錢穀  
授承事郎侍儀通事舍人歷兩考以勤謹見稱天歷間  
文皇親祀園丘公預有事以勞陞奉訓大夫出知晉寧  
路之遼州時公年才三十而當官為政人服其老成尤  
以興學勸農為之本他州縣事有不決者大府悉委公  
理之山西站道崎嶇艱於跋履檄公按視公以地勢所  
因改鑿徒勦民無成功疏罷之滿考歸胙城之班聖固  
有先世墳墓在焉衛輝府君時以處州守受代以太夫

人年幾百歲不宜涉遠道因僑寓江陰公自故里往觀  
省未至而太夫人薨聞訃哀慟終身以不得侍養為之  
恨至元六年遷寧夏路鳴沙知州進階奉議大夫未至  
丁繼母史夫人憂至正二年服闋改奉直大夫知冀寧  
之崞州公以衛輝府君年過六十欲以晨昏奉侍遂辭  
不出明年九月衛輝府君卒又明年八月扶柩歸塋濮  
陽之先塋至正六年春終喪除奉議大夫泉州路總管  
府判官泉當諸蕃商舶之市實貨所集民夷雜居素稱

劇郡公至官適羅天麟寇汀官軍四集供具百需悉出  
公之調度而民不告勞先是廉訪副使梁克中重建郡  
學業完而梁遷他道工遂中止公曰梁公之績不宜敗  
於垂成料材徵役為盡完之贍學田若干畝為豪民何  
氏所據久弗克復公視故牘悉追入之泉之常賦三萬  
餘石興化路歲復輸糧萬石於泉倉吏輩取索數倍一  
石費至十四五緡有司視為常例置而不問公始盡去  
其弊民大悅其輸不日而足政譽藹然臺憲交舉江浙

行省知公廉幹選委溫州白汰門封儲未幾府僚各以  
事去官公歸獨署府事者二年民懷其惠咸禮塔以報  
生為祠公于學官洎石佛寺三山林興祖為碑文以紀  
之已而府官自守以下次第至公得代守與僚屬知公  
清貧相率出俸金二萬五千緡為之贐公謝曰居官三  
年無纖毫私今日受之則前日皆非素守矣況有祖父  
遺訓其誰敢違固辭之去之日軍士庶民結綵焚香于  
其家署曰盧府判生佛送之東郭父老咸曰富庶之邦

其官能免者幾人泉南號佛國曷嘗見士民感服如此  
至正庚寅朝廷重選守令以公知常州路宜興州事到  
官首革吏弊舉廢政民翕然歸心訟為之簡公曰學校  
政本本不樹政奚由出既選士有學行者聘為訓導稽  
考吏牘得隱糧若干未輸租若干為修學資尊經閣規  
模素廣頽弛日久衆欲盡毀之公則為之再造餘皆以  
次新之於是絃誦之聲復振彬彬多興起於學者矣社  
稷之祀有司臨事寓其主於孔子廟門公曰命祀不敢



褻敕改築西南郊垣于果利廟之右而壇墠之如制令  
明年秋七月妖賊襲破江浙省治蔓延廣德公巡境上  
擇險要置營寨招民兵為守備時奸民乘隙嘯聚徒黨  
焚民室掠民財法當申聞公以決不待時擒其渠魁數  
百棄于市民乃安九月晦賊兵襲州城既而常州陷公  
抱印乞師於總兵官定定身率民兵為之鄉導十一月  
七日遂克復之州民為賊誑誤者軍師欲肆其屠戮公  
力陳其情迫不得已某守土臣也當先受誅誅民非辜

帥義之民賴以免而常州註誤之民皆被戮無為言者  
既而省檄徵秋糧如常限公以創夷未瘳流離未復當  
寬其賦具疏于上司未幾詔下曲赦註誤之罪免其稅  
糧與公所請若合符然民謂公能體朝廷恤民之意故  
其誠感若此士民為刻石以紀其績又明年春霖雨不止  
薪米騰價民有飢色公諭富人蔣名三王亮輩出米一  
萬餘石俾民以輟錢糴之錢法且通民亦獲飽州賦餘  
廿萬石舊多吏弊公燭其奸集其人于庭示以利害由

是大小如額富無侵奪之權貧無倍輸之患先期而通  
關出矣至正十四年南山張玄保觀庄王恭等聚黨為  
寇常州萬戶壽童宋至中等統兵討捕久未有功公乃  
身抵其巢穴諭以禍福許其自新衆遂降其後玄保不  
悛復掠民財公遣所部義士張忠施良輩擒獲幾盡公  
在任七年適四方多虞盜賊蜂起州小勢感屢瀕於危  
而撫治有方備禦以法民感其更生之德咸願受策麾  
下蓋公積以誠信得其死力故其獨守孤城四面受敵

而能以敗為功變危為安勞績彰著江浙丞相上其功  
未報承制擢公同知常州路總管府事道阻弗克上廿  
二年公府辟公攝守平江之崑山以年老辭去後七年  
年六十有八卒于崑山之寓第實洪武二年己酉歲八  
月廿有二日也公兩娶先夫人李氏今夫人畏吾氏並  
封濮陽縣君子男六人長元孫次九十次本皆早卒次  
趙兗次猷次瓚瓚與一女皆今夫人之子其四側室  
張氏所出也公昆季五人長弟弘堅福建省照磨次弘

志未官而卒次弘毅浦城主簿次弘道未仕公以宗子  
上承先祀下統羣從內外輯睦人無間言先世遺留琴  
書三世不分昆季之間義深父子衛輝府君沒時諸弟  
皆幼公能撫育使之有成既使弘堅為伯父待制後又  
命弘志承先總管蔭孝友之情至矣至於為政臨民忠  
厚慈惠不為表襮矯激之行而人自化服其處已待人  
簡重安恭一以公為法交朋友協鄉黨恤孤貧務盡其  
力而至誠惻怛之意藹然見於言行之餘可謂古之愷

悌君子者矣喪亂以來鄉里之念既切而風景艱棘竟不能歸日就衰老獨與一弟辛苦共事而弘道事之不曾其父所以將順彌縫怡顏承意不使米鹽碎務得以嬰其懷者蓋不遺餘力也嗚呼盧氏累世孝友之風其尚未艾也哉公卒之年九月丙申弘道洎嗣子璫等既奉公柩權厝于崑山積善鄉小虞浦廣慈居舍之右且手錄其世出行實託奎為之狀奎不佞無能發揚公之功緒勉述其梗槩如此庶幾立言之君子削其繁蕪以

為公不朽之圖幸莫甚焉謹狀

故淵默先生余公行狀

先生諱日強字伯莊改字彥莊姓余氏其先福之古田人十二世祖褐宋吏部尚書徽宗嘗為書其祠額鏤金以賜其家曾大父諱佑大父諱鄭父諱與可仕國朝為武夷書院山長號藍溪先生至元中藍溪始自古田來居平江之崑山故今為崑山人藍溪初娶趙氏無男子再娶陳氏生先生先生十有四年而藍溪卒家益貧

先生孤露自奮篤志于學刻厲修潔盡力以養母雖蔬  
食或弗繼而其親安焉歲時祠薦俯伏齋栗如見其祖  
考之享之者母沒三年悲哀免喪雖近出而返面其室  
必哀泣如初喪至其終身思之未始不流涕於邑也交  
朋友取簡靜朴茂者自輔非其人弗與為友後進有一  
善亟稱贊之若已出即有弗善委曲諷曉使之悅服改  
圖而後已先生於書無不讀尤務精析經術論議講解  
不雜不陋為文深醇宏雅追古作者而弗自炫耀嘗習



舉子業已而厭棄弗為其為人氣象循循恭謹和易治  
事應物未嘗與忤環堵蕭然圖史左右悠然自得視外  
營末趨利祿紛靡舉無足以動其中無求於世不競於  
名用是人莫得而知之蓋先生之為學務實返本而無  
好高驚外之弊與人言降心以從善而不私其故常故  
其學成行尊而勉策如弗及人莫有過者而歛然自以  
為不足也先生生于大德癸卯二月七日卒于至正甲  
午三月二十日其享年五十有二而已嗚乎惜哉娶潘

氏同郡常熟人子男二人長曰安禮次曰安禧女二人  
長嫁王居敬次嫁許淵始藍田嘗後李氏故先生初姓  
李既長詢知其世出乃復姓余氏嘗欲徒步歸鄉里省  
先世墳塋問宗族親黨不逮也先生之遺書有尚書補  
註若干卷詩賦記序碑銘雜著若干首將塋其執友門  
人因先生自號易其名曰淵默先生其墓在州南一里  
先生墓次惟是懸窆之石未有以銘謹撫其行事之可  
知者為狀謁于今世立言君子以圖不朽焉

伯祖行述

伯祖老堂居士名子厚字醇父華亭人其先世以好施  
聞所謂殷佛子者其祖也祖有學行仕宋嘗佐節制使  
以論議不合罷歸帥府再辟竟不起其父當宋亡時又  
能出死力活其鄉人以故其人世德之伯祖為人謙和  
有守且敏於趨事故其家雖既廢卒能自樹立先世有  
宅一區有力者幸其廢而取之伯父諍於族人不可得  
則言輒悲之夫人倪氏語之曰妾雖生不能事獨不能

死為厲鬼以泄子之憤乎遂感病死已而果見怪物竟  
殺其主婦云夫人死時伯祖才三十耳喪之期年而哀  
不衰久之有以無後告者伯祖泣曰幸兄弟各有子苟  
先人不乏祀我得祔食於祖足矣他尚何求哉遂終身  
不再娶烏乎伯祖夫婦如此可以無媿矣始伯祖承家  
世既廢之後力事生產不敢弗及以能免諸孤弟姪於  
飢寒後財雖不甚饒而族人遠近皆仰給焉或少不足  
至形於忿詈伯祖遇之無倦也其與人語必依於孝弟

忠信人皆敬信之今年八十有三其飲食起居無恙也  
天以其是福之歟奎觀曾子固傳洪渥謂渥之行人人  
之所易到故載之若伯祖之行蓋不下渥而世之論者  
類以苟難為賢而伯祖之事又未有以動俗驚世也是  
以願假詞於執事者亦惟不鄙其愚且賤而傳信焉如  
曾公之傳洪渥也不既幸矣哉

故夷孝先生盧君行狀

本貫平江路吳縣鳳凰鄉曾祖諱仁仲宋故不仕妣杜

氏祖諱鑑宋鄉舉待補進士妣沈氏考諱有常故不仕  
妣呂氏先生諱觀字彥達其先龍興武寧人有稱中房  
支者即其族也五世祖始來平江占籍為吳縣人考有  
常隱德弗耀以壽終先生少端重及長刻意讀書致疾  
困劇既差猶篤志不倦師事鄉先生湯公彌昌錢公重  
鼎傳經受業悉究原委隱居教授里中俊秀多所造就  
事親盡禮酒食衣衾必以忠養既老亦不少衰每遇時  
節薦享雖物不得時具而滌濯陳設身必親之歆歔哀

慕恒終日馬平居待人貴賤一致或妄以非禮加之先生終不較其人慙謝待之如初遇人喪塋惠難雖力不能贍亦為之盡心如已事燕人石生死於逆旅先生憫其無歸為之棺斂其篤於為義蓋多類此歲大疫妹之夫劉氏死者逮半先生日視飲食醫藥具棺槨晝夜不去先生亦病瀕死家人相繼陷於危殆久而後已於是體力衰耗病日益侵生事日益落先生亦怡然不形於色身飭子孫讀書習為禮容不少懈耽玩編摩諷誦終

日凡經史禮樂百氏之書下至卜筮醫方小說多細書成帙蓋樂而不厭初不以貧病而輟廢也至正二十一年母卒先生病不能執喪悲號泣涕日夕不輟至是竟卒悲夫先生生于大德二年二月癸卯卒于二十二年十月庚辰享年六十有五所著書有易集圖詩集說草翠軒文藁樂府聲調集總若干卷娶同郡王氏子男二人伯熊仲熙女一人白照嫁傅軒孫男二人彭祖充穎孫女一人曰織將以卒之十有八日塋于長洲縣武丘



鄉先人墓左其故舊門人相與誄行節惠私謂之曰夷  
孝先生華亭殷奎嘗受教於先生者也知先生為詳輒  
敢叙其行事以俟當代作銘者采擇焉謹狀

墓誌銘

墓表附

故處士傅君墓誌銘

處士諱翼字仲翔平江崑山人父榮母王氏處士少孤  
苦既壯業吏事猶不免貧窶其為生甚艱然其志不以  
是而亟夫貨利也有一子則使為儒者其所以教飭之

甚力曰士而貧何有於卓之富也今其子學成遂為儒家處士素直義見人善則為之喜躍不翅在已見為非者則面督過之而不為背憎貸人財度不能償即毀券弗少吝遇親友無飾詞矯貌簡如也春秋六十有八至正十六年丙午歲十月八日卒娶周氏再娶劉氏張氏皆先卒子男輟長女嫁沈源次女嫁陸厚皆周出也孫男杠相孫女杼輟以其月十五日塋其柩馬鞍山陰之中峯處士嘗手寫孔孟書四秩遺令內壙中銘曰艱於

生弗徇世以媮矢其子以學去吏而儒

叶而由反

今既償厥

志又將焉求

故武略將軍錢塘縣男顧府君墓誌銘

君諱德輝字仲瑛別名阿瑛姓顧氏世為蘓之崑山人  
蓋四姓之舊也曾大父宗愷宋武翼郎大父聞傳元衛  
輝懷孟路總管父伯壽晦德弗炫號玉山處士母陶氏  
君幼而警敏善記誦年十六佐父理家事布粟出內家  
衆不能欺然輕財喜事以意氣自豪貴卿大夫多與之

接鄉曲譽望逾其諸父矣年三十乃刮摩舊習更折節  
讀書崇禮文儒師友其賢者喜購古書名畫三代以來  
彝器祕玩集錄鑑賞無虛日甫逾四十悉以田業付子  
若壻改築園池於舊宅西偏名曰玉山佳處日夜與客  
置酒賦詩為樂而君才瞻思捷語笑之頃章篇輒就恒  
屈服其坐人今所傳唱和集是也又萃所友名公之作  
如張承旨蕭李徵君孝光楊先生維禎張外史雨而下  
刻梓者數十家總題為草堂雅集馬鞍山有劉改之

冢為僧徒所據君首率郡人平酹白有司復其屬域舉  
茂才署會稽教諭力辭不就省臣重其材亟任以事君  
皆不屑也母喪斷髮廬墓大閱釋氏藏書探討其文義  
久之若有得馬適淮兵屯吳聞君將用之乃謝絕塵事  
營別業於嘉興之合溪漁釣五湖三泖間自稱金粟道  
人蓋已與世相忘矣歲戊申從其子元臣遷臨濠而卒  
實洪武己酉三月十四日也距其生之歲至大庚戌得  
年六十先是君以子恩封武畧將軍水軍正千戶飛騎

尉錢塘縣男夫人王氏先卒贈錢塘縣君子男五人元

臣前

闕

副都萬戶改奉議大夫湖廣行省理問次元

禮元弼元憲元肅女三人長贅陸琦次適邵適黃孫男

五人元臣之子曰誥諱謙元禮之子曰禧禎孫女六人

君生世承平本富多貲方其年壯氣盛覬慕布衣任俠

之權至以原巨先杜季良自許請致賓客將希蹤鄭莊

一何快也及乎晚節逃名自放汗漫江湖欲招陶峴揖

魯望而與之遊又何卓也而時異事殊志弗克終所為

詩有玉山樸藁二十卷幽情遐致一寄於斯吁亦足以自見矣君卒之年冬十一月元臣以其喪至自臨濠卜以十有二月庚午塋君綽鑿之壽藏君嘗自為壙志戒其子以紵衣桐冒襪屨布襪纏裹入土勿用長物為身累至是理問復以江陰陸麒所為狀屬奎述其遺事銘之石始君北遷時嘗過奎曰吾與子為死別烏乎孰謂君果不返耶雖文不腆其奚忍辭乃次而銘之文所不能悉則互見其自志云銘曰四姓望吳粵自古初脩美

維君亦名厥家少慕為俠馳騫里閭中始變節黜其豪  
奢逍遙林泉曠懷自逸抗志煙霞高謝薦辟咄哉莫年  
殞命遐遷匪君之愆其又誰怨綽綽之陽白雲之琅吾  
寧暫遊茲焉終償旅魂縹縹來歸自濠其寧永久尚利  
爾後華亭殷奎述武寧盧熊書并篆蓋

朱徵士墓志銘

徵士諱玉字君璧姓朱氏先世自江西來吳今為崑山  
人祖已上譜逸考諱玄妣秦氏徵士幼穎異生十二年



遭外艱能厲志樹立既長喜繪事聞佳山水每脩然獨  
住數千里不以為難永嘉王振鵬在仁宗朝以畧畫稱  
旨拜官榮顯徵士從之遊盡其技王君亟稱許之至順  
庚午中奉中宮教金圖藏經佛像引首以進方不盈矩  
曲極其狀而意度橫生不束於繩墨人言王君蓋不之  
過云至正十有五年清寧殿成勅畫史圖其壁吳興趙  
雍以徵士輩六人聞使使召之家道阻弗果上徵士亦  
既老矣偃蹇一室以圖史自娛楊維禎先生所為記

月樓也徵士行內修平居言貌循循薄於利欲身且老  
猶精謹如壯者廿有五年十一月七日卒春秋七十有  
四娶諸氏子男二長曰佑賢其幼輔德蚤亡女一適許  
氏孫男三曰翬翬妻孫女一曾孫男一曰寧曾孫女一  
明年某月某日塋馬鞍山陰予聞界畫家王士元郭忠  
恕為首冠面偕高下一守矩度而王君視筆為尺曲折  
層疊自如度越古人矣徵士得其傳是可銘也銘曰名  
藝之成太平之澤貽爾子孫尚引弗替

陸仲德壙銘

仲德諱德潤吳郡諸陸之裔也大父珪父某世居崑山  
仲德好陰陽星歷學客江西得秘數益推極其說節殊  
脉貫使於理弗鑒柄學者是之然頗自閤匿不亟以語  
人久之乃知仲德則既老矣仲德為人簡潔退然類無  
能者然喜信義交久愈益善里中有爭仲德嘗諭止之  
後其人竟訟逮仲德吏仲德深自辱即發憤死吳元年  
丁未四月廿八日也得年七十有三娶曹氏先十二年

卒子三人男曰士良曰天與女適周復孫男女各一士良以是年十一月癸酉祔塋于太倉城南之先壟問銘于殷奎與之銘曰不虞其愆不辱其金何愧焉

故盧府君夫人王氏墓誌銘

夫人諱蕙字靚之平江崑山人祖諱國器父諱慶詢母范氏慶詢子女五人而夫人最長得蚤承家教誦詩識字縫紉烹飪皆精善年廿三為同郡盧府君諱觀之妻禮頌端肅不妄言笑不輕出屏幃甚為姑章所重府君

孝友能貧夫人相之唯謹其訓子女弗加笞責而悉能有成待妾御未嘗訶叱鄉閭稱誦為楷法府君老且病夫人經年不解帶府君歿後其子熊以祿仕迎養郡中既而平江被兵夫人居圍城中憂悸成疾克城之日熊被創甚例遣上道幼子熙自崑山來奉夫人歸里舍關法不出婦人仍主於滕君德進滕婦萬視夫人如尊嫂親為調護吳元年冬十一月夫人疾革日在辛酉遂卒年六十三貧無以為歛滕君復命諸子經紀其事親故

亦多往賻者熙始得墓夫人之柩于長洲縣武丘鄉去閭門五里初府君之墓熊為夫人豫作壽藏兵後他冢悉發而府君墓獨無恙至是竟合祔焉豈先德之厚陰有以相之也抑夫人平昔為善之報固如是耶熊博學有才諳熙亦好修篤行女照嫁士人傳與孫男二人孫女二人熊既丐銘于曹氏以奎嘗受教府君有契家之誼復俾為序云其銘曰有子而任緊親之喜曷養之弗終覆憂以死孰衛其藏弗毀于兵合祔於此尚慰而子

元故靖夷先生顧君墓誌銘

先生姓顧氏諱權字伯衡世居婺之蘭溪其父達卿始  
入吳因占籍崑山娶婦生子為崑山人達卿在蘭溪與  
雲峯胡先生同里閉心敬慕之期有子當使為士及生  
先生見其凝重岐嶷益自喜銳意教督之先生少長能  
體父之志敏力學業不以初寒盛暑為少輟既壯博習  
羣書尤究心於易以教授里中里中子弟多從之游時  
人莫不善其父之能教也先生為人不事矜飾喜哦詩

飲酒常頽然自放然其交際恭遜久益謹蓋未始忤人  
也中歲刻意為文章有古作者矩度雖一字未當不為  
苟止其志亦欲以是少見於世者遭時喪亂竟窮於無  
所就以死年不滿五十無子男昆弟族人為主後烏乎  
天於先生乃命之如此悲夫先生娶呂氏生子輒歿死  
買妾得一女尚幼其卒以至正廿四年九月丁亥其墓  
以十月丙寅其墓在馬鞍山之北麓其墓事知州僕侯  
斯教授蔡君基之所具也墓有期日其故舊門生咸痛



其有德無後相與私謚之曰靖夷先生而奎與為銘也  
銘曰善不必有後仁不必皆壽彼夢夢兮誰則能究言  
甚文兮行甚茂烏乎先生為我能為兮苟不在我其奚  
咎

從祖五府君墓記

君諱子諄字仁甫其先華亭人王父萬宋節制司幹官  
王母孺人進氏父澄母俞氏所生母潘氏娶任氏繼朱  
氏皆無子妾徐氏生男女各一人男幼亡女贅某朱前

嫁陳氏生男符今冒姓殷字信卿者也君生以至元壬午六月十五日卒以至正壬午正月一日春秋六十有一墓在崑山東倉之原其兄孫奎為之記哀哉

外兄陳君寔室銘

君諱堅字孟固姓陳氏祖早卒祖母朱再適殷氏以子符從符因贅殷父前出女實生君仍父子冒殷姓君生廿有三年不幸淹瘵而死妻蔡氏宋武節大夫珂之孫生子桓孫七日而孤悲夫君生之歲為天歷戊辰月為

丁巳日為庚戌死之歲為至正庚寅月為戊子日為丁卯寔之日為己巳銘曰陳其氏殷非實有志復遽死疾我今成之刻其室

先叔父君楸甫石表辭

維至正十有七年四月庚午處士華亭殷君楸甫以疾卒癸酉還葬崑山吳岡門之先塋禮也君諱楸一名昌字君楸曾大父萬宋嘉興節制司幹官王父澄父子諱並隱德不顯母邢氏妻魯氏繼室柏氏兩娶凡產四男

三女男輒歿死於是以兄子璧為已子璧既娶婦有二子矣女子伯妻郭戡先卒仲妻龔遂良其季以盲廢君生皇慶壬子春秋四十有六其卒也後其母十二日母亡君以卧病不能執喪哭泣哀慕病劇而隕其生悲夫孝友秦先生改葬記

大元至正四年三月廿有四日孝友先生秦玉德卿卒享年五十有三其子約塋先生於州治之南三里會稽楊維禎先生為之銘今廿年矣癸卯歲其伯兄鼎以高

年終而南原之墓薄於新城乃謀塋其具塘先塋之次  
因亦改塋先生實至正廿四年甲辰春二月庚申也同  
郡殷奎為之記其粹德懿行與夫州里世出則具見于  
楊先生之文

有元奉議大夫常州路宜興州知州盧公權厝誌  
公諱僧孺字希文姓盧氏其先范陽人自五季逮元初  
凡三徙今為開州濮陽人曾祖諱璉燕京等路萬戶府  
典魯總管贈亞中大夫東昌路總管追封范陽郡侯祖

諱克柔通奉大夫河南省叅知政事范陽郡文昭公考  
諱景正議大夫衛輝路總管妣范陽郡夫人劉氏而翰  
林待制諱亘者其伯父也公生膺世美器宇凝重才諳  
蚤成稍長入國子監為生員始冠以文昭公陰授承事  
郎侍儀司通事舍人至順三年以勞陞奉訓大夫出知  
晉寧之遼州至元六年遷寧夏路鳴沙知州進階奉議  
大夫未至丁繼母史夫人憂三年改奉直大夫知冀寧  
之崞州復遭衛輝府君喪終喪除奉議大夫泉州路總

管府判官有善政轉常州路宜興知州考滿留再任歷  
七年當四方兵起撫循捍禦厥績尤著至正十八年江  
浙丞相承制擢公同知常州路總管府事道阻弗克上  
廿二年太尉府辟為平江路崑山知州旋以年老去位  
後七年年六十八以疾卒于崑山之寓第實洪武二年  
己酉歲八月廿有二日也公兩娶先夫人李氏今夫人  
畏吾氏並封濮陽縣君子男五人長曰九十次本皆早  
卒次趙兒次猷次瓚其猷瓚與一女皆今夫人之子其

三人側室張氏出也公弟弘道洎嗣子璵等卜以九月  
丙申奉公柩權厝于崑山積善鄉小虞浦之西原而託  
奎誌其世出爵里卒塋歲月梗槩如此其詳則俟它日  
歸祔先塋而後書云銘曰鞍山峭拔壁積鐵逾小虞西  
氣靈結屠維作噩屆玄月噫盧大夫寓此穴宜爾子孫  
紹先烈

呂德常權厝誌

呂氏之孤復自平涼以書來咸陽致其先君子之事狀



一通曰復不幸罹奇禍先人泊吾大母某吾母沈皆以  
憂患歿旅次二母幸以還葬家塋吾父獨客骨長安弗  
克歸復不孝為羈平涼蚤夜不寧庶幾異恩僅得返塋  
逮今五年矣懼終無以盡人子之責忍死卜以今年某  
月日權厝平涼尚相依以居相守以俟先生吾父執也  
所以志變故者不可無辭以刻敢以是累先生於戲吾  
忍誌吾德常也耶顧義不克辭廼序而銘之德常諱恒  
松江華亭之呂氏德常其字也曾大父某大父某父良

弼號來德翁世饒賢翁生長承平思襮忠琢樸用詩禮  
自賢於是築舍館招致儒先生日夜課子弟集賓客為  
文墨事而德常以長子綜家務剗厠曲隱彌補罅漏不  
少貽親憂以故翁得自佚於老以償其本志一時勝人  
韻士莫不莫然與之交門不停謁堂無曠筵至今浙水  
西言善富能好禮者推呂翁則以德常為之子也方是  
時予以弱齡拜翁於賓階翁能折行輩與為禮德常固  
弗良行然所以先後飲相者甚恭既辱假館從會稽楊

廉夫先生游實與其季連業今遷慶陽曰恂字德厚者也後十餘年翁歿德常伯季所為述父事者益力洪武己酉御史首隱糧事連呂氏沒其產徙其孥陝西蒼黃流離因踣道路孫男六相踵以斃既而妻死白下母亡山陽德常至長安遂以毀卒烏乎悲夫俛仰事契于今二紀猶一日也而變故之來若是其劇何哉德常年若干卒之日為庚戌之歲五月十又一日二子長曰充謫延安次即復也女二人長適邵先卒次適謝權厝之地

在平涼某原銘曰彼保壽慶而令此遭命噫

澄江盛先生壙志銘

先生姓盛氏諱德瑞字祥父江陰人少孤鞠于祖母稍長俾受學鄉先生陸子方氏逾冠徙居崑山以周易教授閭里至正中聘先生入學宮為訓導在事七年教詔之績紀于學徒既乃遜伏田野游心玄微與時消息著易辯疑五卷洪武四年辛亥歲閏三月三日以寒疾卒塋于常熟南沙鄉之原春秋六十又八子二人男曰有

天女嫁王復銘其壙曰海虞之東南沙之南是為盛先生之幽宮其藏之深其封之崇尚慰其學徒之心

大明故處士瞿君墓誌銘

吾里有二瞿先生儒雅風流表帥一時雖其出處不同而孝友無間風致一節先生諱斿字睿夫歷仕郡縣教官屢辟藩府卒塋某地自有誌君其季也諱信字實夫生嗜學善持論平居整暇無卒聲辟貌朝夕食必男女異席巾帽非不寢不去書冊筆牘恒在手喜臨法書曾

倣徐鉉體寫論孟子楷正精麗藏於家睿夫出四方君  
事父母當其意其養雖貧父母驩焉嘗有台寇君負母  
辟地青龍海上母安焉君遂改築其處題其堂曰閒野  
雖居隱約客來恒滿坐終日語未始招人過故士多親  
君睿夫卒孤兒女數人君煦字之甚至其婚嫁已子如  
也張志道老儒寒甚君遇之戚然盡解所衣衣衣之他  
急義類此至正中南臺御史李烈舉君孝廉不應其子  
度舉茂才授池州學正亦不使赴也洪武元年十月君

來故里視劉氏女得疾暴卒其月十五日也曾大父熹  
大父鎮世居蘓之嘉定父晟始居崑山通星歷學任教  
授其州母吳氏妻金氏子四人男曰度好學有文采今  
知臨洮府金縣事次曰庠女曰淑寧嫁某淑貞嫁某蚤  
寡孫四人男曰翕如純如女曰婉婉始君之卒也有兵  
戒還墓惠安鄉三里涇北其地下濕度謀改卜某縣某  
地將以某年月日遷厝君而請奎銘其壙奎少也辱君  
兄弟知厚而金縣又同門也雖不佞敢不酬君以所知

者乎故嘗為之語曰簡而裁白而優節不亢於狷介情不爽於孝友王君公陳季方馬少游其一流人也是為銘  
洪武七年正月十三日咸陽教諭殷奎撰

故將仕佐郎西安府咸陽縣主簿趙君墓誌銘

君諱璟字德瑩一字文英福州懷安人也幼警敏習舉子業明尚書太義洪武辛亥以儒士敦遣赴京擢咸陽主簿御對賜衣一襲其年十月廿八日至官明年三月以軍興憂怖得寒疾狂惑不治遂以是月甲戌卒官春



金史卷之八  
卷四  
秋二十有四其大父父皆無恙君尚未娶幸以盛年遭  
時用儒得一官數千里外未及展布又不幸而客死悲  
夫塋以丁丑其地在縣城東北五里其具皆縣寮為之  
銘曰杜郵之西平陵之陽有廬者原是為閩人趙簿僑  
寓之藏其固其寧其魂氣無不之也夫何必乎故鄉

故處士何希顏墓誌銘

處士諱仁字希顏姓何氏蘓州崑山人也曾祖某祖某  
父天佑世為儒天佑贅同縣潘氏因業醫外科名其藝

處士幼承家業淬厲不怠兼為內學取古書若難經素問之類熟讀研思以進其技有衆人所不及者見人有惡疾即慨然思拯之鄉人由處士而全者皆是也然處士未始自以為功亦未始責人報也嘗自誦曰為醫者當半積陰功半養生可也故人皆愛重之處士為人篤實易直善養親能取友平居喜讀史書畫竹石以自適澹然無它好洪武五年四月十六日訟有連處士逮繫京獄既讞知非辜處士亦且疾釋微纒居之外居無何

病轉劇遂以是年十月九日死逆旅年三十有九宗人  
宗之洎高泰亨為瘞其柩聚寶山側訃至天佑以其骨  
歸葬馬鞍山陰明年二月十日也娶沈氏生男二長曰  
增次歿女四人長某適莊凱次皆幼未行將塋增泣曰  
增天地一罪人也生不能致孝沒不能盡禮痛哉願書  
其槩以示久遠辭不獲故書之以納其壙云銘曰生之  
脩曷死之非郵既不爾郵死爾何求

故善人余景明墓文

蘓於浙水西為地尤下湮人死不皆得高原廣壟以墓  
則相為火柩以腐沈江流或葬之夷人習見以為當然  
曾莫之知非也異時吾先子喪吾祖嘗援禮以行之而  
謂者交至今俗又益媮視棄禮義如土苴非夫篤信之  
士曷能自拔哉比吾歸自關西則聞余員氏有親喪能  
買山墓吾曰嗟乎是加於人一等矣已而員來請予為  
石表刻辭予既喜其事遂不辭而述之按員之言曰員  
先世處縣之東鄉我大父諱某躬耕菑水之上蓄德而

不銜我父諱某字景明業估事為人長厚嘗行貨他州  
同邸商或失貨妄擬我父我父獨庶知某竊者秘不自  
明曰彼竄人其婦今免身覺無賴必且為婦禍吾橐中  
幸有貲即出以償仍敕員勿敢泄蓋其他行多類此我  
母朱常熟人也自其盛年事我父即佐以儉勤我父以  
商恒他出母獨留經紀家事且嚴教員員今幸得聞教  
搢紳先生母之力也今年春刑部不以員不肖辟為史  
符州縣遣致甚亟當上道二親以至愛為員慟哭幾絕

當是時竊念親年尚未老既迫命不獲養志田里僅得  
斗升祿為菽水奉烏乎曾未數月孰謂二親乃遽相踵  
下世乎痛哉痛哉員不孝遠去左右以遺親憂祿養弗  
遂竟抱終天之恨罪復何言惟是送死之具所以表祿  
其幽輝以慰吾親於地下者不敢自菲薄先生幸哀員  
敢忍死以請又曰始員父病亟時員在京邑喪者殆用  
火員之友有某某徐文友者援制令為員沮衆議殯其  
喪且亟赴員烏乎我二親得免於水火緊二友是賴尚

併著之嗟乎予蓋習知員居里舍能飭身以致孝不幸  
有大故又能以禮卒事是其母之能教固不可誣然君  
子以為豈獨其母哉亦其父祖之所蓄積者宜有後員  
方以才諳為世用余氏且必顯不當使無考也矧員塋  
親又以禮二友者有古道不表之無以厲俗故為論次  
如此員父年五十有八卒以五月十有八日母年五十  
有四卒後父卒四日塋以六月廿又七日墓在縣北郭  
馬鞍山之南岡今年為甲寅之歲大明洪武七年吾縣

則蘓之崑山也是年十二月一日

朱曄妻趙氏墓誌銘

代作

亡妻趙氏名貞其先自開封徙家蘓州崑山宋仁宗英  
宗朝參知政事太師康靖公十一世孫也曾祖長卿承  
信郎祖俊孫父景星玄學提舉母王氏玄學初娶劉又  
娶王皆無一丈夫子獨有孺人愛之甚為之擇對以與  
同縣朱曄相我內事夙夜憂勤既而有子有婦且畢婚  
嫁而疾疢嬰之矣烏乎結髮相好偕老是期如何不淑



竟殞厥生痛哉痛哉子男二長曰緝以後外王父先卒  
次曰晟女二長歿次壻馬弼孺人素孝敬其奉宗事唯  
謹善養親能於其族鄙卑下有過立禁止之未始以姑  
息為慈也以歲癸丑十一月廿日卒距其生之年天歷  
乙巳得年四十有五塋于縣治東九里婁江之陰孔巷  
之里實龍集乙卯大明洪武八年之二月廿四日也銘  
曰薶之玉婁水曲固以寧貞哉卜

大明故承事郎同知開封府睢州事盧府君墓誌

銘

府君諱熙字公暨年三十有九以同知睢州事卒官返  
葬蘓之長洲武丘鄉先壟其兄公武屬友人殷奎為銘  
奎外家與盧氏有連奎又少受學於其父夷孝先生實  
與公武昆季同業羣居出遊未始不與俱也銘其獨得  
辭乎迺洪武四年詔起丘園之士分職中外公暨遂以  
一命為州上佐時中原兵革甫定死傷流離遺民無幾  
歲復薦飢公暨到官謂宜壹意休息則贊其守煦嫗撫

摩勞來安集唯恐不逮不敢輕以民力立事幸功也明年公暨行守事商侍御史曷御命搜討舊軍所至陵轢藩府鞭笞長吏悉籍見民為兵睢數千人檄州拘送於是公暨召民使自實得嘗隸尺籍數十人畀之侍御怒甚械繫曹吏必盡得乃已不然且以沮格上奏同僚懼議發民如所指公暨曰吾守民吏也民散吾誰與處即自詣侍御奮曰州已無籍軍今民且散走獨有同知請以充役侍御怒斥之堅立不為動彼卒無以奪民賴

以安公暨平居恂然貌不自持其當官有守乃如此其  
遇吏民推誠汎愛不喜任筆楚務養其廉恥故吏民皆  
化其德不忍有所累信其守不敢干以私六年授承事  
郎七年六月公暨受事郡府得下利疾告歸州宅涉月  
良已倏有疽附骨潰于腰下知府王公博知州董公俊  
屢迎醫不克療吏民相率禱于神明者累日竟以其年  
秋九月一日不起嗚乎悲夫公暨為人雅飭信厚博涉  
經史尤善小學筆札清麗居官少暇讀書不輟一室蕭

然衣無新製料錢祿米以奉過客周急難未嘗使有餘  
及其卒也無一金之藏棺斂殯莫皆董公為之具發引  
之日吏民哭輓者數百人道被大雨無一人少卻雖田  
父野老咸為服一月語之未有不流涕者烏乎庶幾古  
之遺愛者矣昔予往闕西道過睢公武有詩寄弟有蓋  
鹽清夢鐵石古心之辭公暨賓諸座右其後有從東來  
者多能言公暨守官清謹有民譽及聞其按軍事能以  
養奮不畏彊禦每引以自壯今年得告還東擬過睢相

與勞苦行至澠池乃聞其凶耗哭之於郵亭及過泮傍  
邑又聞睢民悲哀行喪如此即抵其州境遂為詩以哭  
吏民亦來會哭是時公暨之喪已南還矣廼今遂哭其  
几筵而銘其墓可悲也夫可悲也夫盧姓出范陽公暨  
先世由隆興武寧來吳中曾祖鑑宋平江府待補進士  
大父有常始占名數崑山故今為蘇州崑山人考諱觀  
博學通五經所謂夷孝先生者也公暨妻同縣張氏子  
男二人長充賴次曰暘孫先一月卒女一人秀奴是歲

甲寅十有一月壬戌朔則其墓之日也銘曰有懿盧宗  
孝友素風累德無位廼今始仕昆弟渠渠競爽誰如彪  
然甚丈江南二徐伯仕而止仲以徵起試佐襄邑儒效  
卓爾其試幾何其愛則多刻銘孔彰尚尉幽堂

亡弟殷孝延壙銘

婁為里殷為氏亢為名孝延字生距死纔廿禩吳元年歲  
丁未月壬寅日乙巳從先人墓于是前高岡後流水寧  
爾居千載始噫

崑山殷壁妻曹氏墓誌銘

曹氏世居吳縣之包山其後徙崑山東倉累世以善人稱至諱昌行尤卓迺獨早沒其孤女適人又不得年夭之報於人何如也昌字子美娶魯氏其孤女名少寧六歲喪父八歲而母亡其大父母念之屬昌弟英夫婦養視及笄以嫁同縣殷壁殷與曹有媿知其女之能於叔父母則能於舅姑無疑也初壁之仲父無子壁父以壁為之後及孺人之來兩堂舅姑皆無恙事之舉得其歡




心人尤以為難也不幸以疾卒于洪武己酉十二月廿  
有八日距其生之歲元至元丁丑二月十六日得年僅  
三十有三其所出男女六人男曰陽生曰夷行女曰瑜  
曰琬曰瑾曰璵璧以明年正月一日塋其骨于吳岡門  
殷氏先塋之側其大父名顯璧字孝連銘曰兕啼母夫  
泣妻姑號婦烏乎天乎知此否

殷母墳銘

母諱真姓邢氏平江嘉定人考曰益妣曰張生廿年歸

殷氏是為故處士子諱字德甫之室人貞孝慈明克配  
君子春秋七十有八後其夫二年而卒卒之十有五日  
穿其夫之封以塋實至正十七年四月乙巳朔廿九日  
癸酉也哀子庠誠信卒事有足稱焉其辭曰婁之東城  
信義鄉殷父母邢同穴藏閱千斯齡樂未央



強齋集卷四

欽定四庫全書

集部  
強齋集卷五

詳校官庶吉士<sub>臣</sub>龍廷槐

中書<sub>臣</sub>劉源溥覆勘

總校官降調編修<sub>臣</sub>倉聖脉

校對官檢討<sub>臣</sub>季學錦

謄錄監生<sub>臣</sub>方步蟾

欽定四庫全書

強齋集卷五

辭

菊泉辭

并序

明 殷奎 撰

四明俞勉中氏世家象山之下其先君子南屏先生當  
公卿爭下士之日獨抱良材謝絕薦辟間獨以詩鳴其  
不平識者惜之勉中既以諛彥出應世用而瀟澹雅潔

每有遐心焉菊泉以為命其志可想見矣癸丑之春使  
過咸陽為予傾倒因為作辭二解俾登高望遠之頌歌  
之以相其志云象之山兮其石鑿鑿山之人兮誰與為  
樂朝吾山揖兮莫山與酢有菊我餐兮有泉我淪昔之  
隱兮誰者則招今之思兮其歸其遠歸兮歸兮彼象之  
麓可以保族彼菊之泉可以引年其蓬之水兮載淺載  
清象之雲兮其出蒸蒸其出其歸我奚容心我心悠悠  
我思悃悃我思悃悃我心悠悠我菊尚存我泉尚流歸

來歸來無使菊荒兮無為泉羞

其二

孫吉卿哀辭

并序

孝經援神契云命有三科有受命以保慶有遭命以暴  
謫有隨命以督行遭命者言行善而遇凶也若孫君吉  
卿之死是已去年冬十一月予候君飄寓中君為予言  
遭世艱棘思欲下從先人遊而家世壽考又不忍自戕  
柰何言畢泣下予亦為之愴然今年正月丙申君即自  
沈于江家人援之不果沈越五日辛丑晦竟自刺絕咽

而死痛哉夫其慕義而強仁恬逸而能施宜享上壽保  
慶令終而事乃如此豈所謂遭命者耶然吉卿弗與貪  
饕者同生弗與僥倖者同壽潔身不辱樂死如歸有衣  
纓士大夫所深媿者而或乃誚其不達何其不知言之  
甚耶予恐吉卿之志鬱于地下而不得白為作辭以哀  
之其文曰零霾濛鴻兮風焱怒之太行險巖兮荆榛莽  
之蝮虺橫結兮魑魅旁午目俛俛兮羣步阱戶猗斯人  
之獨閔兮慘煩惛其誰語宵耿耿之不寐兮旦吐吐之



無與冒溫蠖之吾弗能兮孰沮如之能處與其覲以偷  
生兮吾寧無生之為愈上天兮蒼蒼長夜兮茫茫絕吭  
而逝兮軌遺塵乎西山之卧僮已矣乎衆貪婪以苟活  
兮子獨抗志而莫奪憤世以嫉俗兮甘殺身以徇潔以  
死為樂而謂生可厭兮孰云蒙懂而非達烏乎哀哉作  
善離凶兮不究于年是曰遭命兮非子之愆細人之倖  
兮君子之安重泉有知兮慰以斯文

祭文

祭殤女文

維至正十六年正月庚子朔越廿有二日辛酉阿爺阿娘以果餌美物之奠祭汝第二女子福娘之魂烏乎汝之生世于今四年汝生慧甚玉潔蘭娟天愛靈秀汝取多焉命之長理亦宜然歲暮攜汝避地江滸倉皇出門衝冒風雨寒汝使啼驚汝使苦病不能食悲莫得語疇昔之夜汝毋夢云方卧床第奪於鬼神及汝祖母汝叔汝姑夢皆有緒可信不誣汝命在天定之既久孰為

禍福可使殀壽鍼藥弗施候視不專人事未盡命焉責  
天汝今死矣罪則在我念此傷心出涕滂沱茶果既設  
親戚畢來汝其食飲以慰我哀

祭沈氏妹文

維至正二十五年十一月八日辛卯阿娘與大哥二哥  
九弟箕等以羊酒之奠致祭于沈氏三娘子之靈烏乎  
自汝嫁沈氏至今才十年其間喪汝祖又喪汝祖母又  
喪汝父喪汝兩叔父兩從妹一門骨肉死者七人悲憂

相仍曾無虛歲禍亦極矣今又喪汝烏乎天乎降此酷  
罰何其多乎宣吾母子積此殃咎而延及於汝乎將憂  
怖抑鬱食飲不時藥物非良而戕其生乎抑天命有常  
死生壽夭各有定數而汝之數止於此乎不然何汝之  
豐端聰慧孝謹睦婣宜永其壽而反夭乎烏乎汝病餘  
二年矣去年冬少瘳嘗來歸寧吾見汝神爽猶完以謂  
可無憾矣既而病乃加劇遂不可療烏乎吾老矣望汝  
他日送我之終而今反先哭汝乎汝前曾產一男才五

歲而殀死今竟無子以送汝烏乎孰謂我之哭汝乃類  
汝之哭子乎事之乖謬一至于此烏乎痛哉汝今往矣  
聲音笑貌不可得而復見矣吾之痛苦其無窮矣持此  
酒饌與汝永訣汝其知乎其不知乎烏乎痛哉尚享

祭先師鐵崖楊先生文

維洪武四年辛亥歲九月庚戌朔十有一日庚申門人  
新西安府咸陽縣教諭華亭殷奎謹以清酌雞黍之奠  
致祭于先師故奉訓大夫儒學提舉鐵崖先生楊公烏

乎奎自幼歲竊讀三史正統之辯知千載之公是定於  
先生之斯文繇是益求其書手抄口誦歆羨想見而不  
可得也意其非今世之人生十有八年當至正戊子之  
歲始獲灑掃於先生之門一見之頃謂此子可教吾授  
之經春秋大義謹嚴之訓教三傳之得失日夕討論既  
間使學為文章六籍而下孟氏之辯太史公之健離騷  
之憂韓愈之粹莫不直指而畢陳博之以萬變之奇而  
約之以一理之真至於獎誘之過屬望之厚則曰汝其

為大儒後當有聞而奎也。顧蒙無似年餘四十未克有立。每竊嘆而自語。懼無以少酬其知遇之恩。茲咸陽之改授。猶備員於校室。庶幾得為學者講明先生之一經。使關西之家學不終墜於地。儻可以贖其不敏之愆。今當遠去。顧瞻徘徊遙酌一觴於先生之墳。幹山嶙嶙並澤沄沄。懷先生之不忘何高深之足云。伏惟尚享。

祭咸陽靈采泉文

維洪武六年太歲癸丑四月壬申朔越八日己卯具官

某謹以清酌之奠致祭于靈采泉之神曰惟天之靈氣  
或聚為日星或鼓為風霆或澤為雨露或厲為霜雪或  
融為河海或結為山岳或靈而為人或蠢而為物此皆  
有恒象矣至於泉源之發則有仰出者焉謂之檻泉有  
垂出者焉謂之沃泉有仄出者焉謂之汎泉有甘者焉  
謂之醴泉有溫者焉謂之湯泉有濁者焉謂之黃泉有  
美者焉謂之寒泉清泉有惡者焉謂之貪泉盜泉亦各  
有恒性也爾泉乃獨不壹其色俄而則黃俄而則赤俄



而則玄俄而則碧隨時而變遷莫可窮詰是豈天之戾  
氣耶何其不恒若是也不然則夫取其靈氣者多故其  
與夫常品者異爾自用兵以來垣頽甃缺厲斬而道第  
蓋未有即而賞之者也何爾泉之不遇也遇不遇時也  
即不即人也泉豈有加損哉迺三月丁未某從僚屬有  
事于山川循城而北逮於邑厲有指以告者則相為環  
睇咨嗟察其變動徘徊久之因為靳除其地完甃其涯  
壇而墀之榜其門曰靈采之泉靈言德采言色也於是

觀者日衆而水旱疾疫之禱至焉而泉之能事不徒靈於其貌矣惟泉有神尚克相我有民時若雨暘用昭受報祀永永無斁尚享

祭趙主簿文

維洪武五年歲在壬子三月戊申朔三十日丁丑西安府咸陽縣知縣吳本縣丞萬仲能教諭殷奎典史鍾承吉等謹以潔牲清酌之奠致祭于近故將仕佐郎咸陽主簿趙君之柩曰嗟嗟德瑩乃至是耶人之生世吉凶

壽夭糾纏倚伏涓涓汙汙莫識其躅方其生也有喜有  
悲有榮有辱俄而珪組俄而桎梏變幻萬狀不可詰鞠  
子今逝矣孰知非福嗟吾德瑩謹愬而文年始逾冠學  
已有聞朝家用賢南徵于閩州府逼迫銓曹選掄錫命賜  
衣恩光赫新俾來作簿于我咸秦如何一疾遽殞其身  
烏乎哀哉去家何遙幾七千里在官何淺纔十五旬何  
壽之不長何祿之不臻將職憂之勞悴抑命數之在屯  
烏乎哀哉故鄉迢迢返塋孔艱取法羸博僑塋北原旅

魂揚揚往無不伸其歸其歸依爾族親訃告之書託諸  
郵人庶速得此消息之真烏乎悲夫父失愛子翁失令  
孫聞此不堪驚怛痛辛日月以冀平安是詢遲子來歸  
榮于鄉鄰何賀者猶在閭而弔者已在門烏乎悲夫某  
等或後或先忝處同寅棺斂既具牲醴斯陳寮窻之好  
畢于茲辰蔽形匿聲欲見無因一慟永訣誰不傷神君  
尚有知歆此情文

祭邵雲窩文

昔我曾大父與公之先府君交相善而居相鄰兩家子弟  
卅角同遊而我先大父與公相與為尤親雖中間出處  
不齊遂成契濶之久而往來音耗之無間隔千里而達  
志志甲申之歲我大父嘗訪公於雲窩而奎實操杖屨  
以侍始獲拜公之下塵尊俎笑談留連累月聆話言之  
諄諄乙未之春奎從大父奔伯祖之喪得一再拜公于  
客館其秋我大父即世明年先子挈家避地於故里見  
公益強健而精神其後五年先子亦歿又十年而公

來濠梁卧病於東屯迺仲冬之三日奎省公於床下尚  
言笑之訢訢孰謂此別遂成隔世曾未浹於半旬烏乎  
老成彫謝風景艱棘永懷先世之事契不知涕淚之沾  
巾今當遠去數千里外旅次無以為薦聊雞黍之是陳  
烏乎哀哉公尚有知乎歆此情文

費治中祭子文

代作

嗟嗟物理萬有不齊禍福壽殀莫可究知念汝之生性  
質穎茂自稚及壯惟學是好誼經論史立志孔高疲精

竭神奮不辭勞竟淹于疾遭此天過父子至情中腸如  
割昔我逃難與汝分離後先其來復聚于斯庶幾餘年  
相養相守天胡不仁事乃大謬吾家四世傳襲在茲汝  
寡兄弟我年又衰世職宗嗣孰承孰繼念此傷心哀感  
無際自汝之亡今逾一朞我心之痛曷有已時持此酒  
饌奠汝之墓汝知之乎我意誰訴烏乎尚享

祭清真錢景明提點文

烏乎錢公其生平為善之迹有衆人所不及者三焉身

為道士而能追孝祖禰周卹親族口誦異書而能敦尚  
儒術接禮賢才心遊物表而能見義勇為陰扶名教故  
其父母之族自功總而上多仰公而舉饗賢士大夫之  
東西行者無不造公之廬而樂與之遊至於贊吾黨以  
表儒先之遺迹相邑長以成養老之美化是皆衆人之  
所不知而公獨能為之可謂加人一等者矣不表著之  
何以戒夫忘本自私凡鄙貪吝之徒也哉某等或晚接  
賓朋之末或早蒙獎誘之知痛末俗之日媮哀老成之



無在臨風一奠蓋匪其私

吳克誠祭女夫同知曹子學文

代作

嗟嗟子學曹子大族挹其清芬比德真玉夙躋膺仕歷  
踐外服都昌溧水僅著能聲信幕帥司未騁華轂司錄  
錢唐作宰定海暨來崑山驅馳十載席不暇暖突亦未  
黔如何不淑奄忽殂遷嗟予老矣有賴於子孰知來今  
反哭于此昊天高高疾呼不聞孀嫠叫號莫贖百身承  
家乏嗣反塋無因使子至此天胡不仁嗟子平生苦心

翰墨蟲篆汲書秦銘漢刻披幽抉隱是正訛咸成書孔  
多梓棗未勒予其保藏不使散失庶傳學者以彰子績  
予其無憾此實予責俎有嘉羞器有豐粢念子永歸以  
與子辭帷尚蔽柩欲見無期子尚有知當知我悲烏乎  
哀哉

祭府君祝文

歲序徂遷日臨重六藐孤弱質實降在茲永念劬勞昊  
天罔極謹修菲薦維以告哀

忌日祝文

霜露既降諱日在辰君子終身之喪致哀斯切昊天罔極之德永慕惟深供設几筵伏祈來格

刻墓碣成告先考祝文

維至正二十三年歲次癸卯十一月丙寅朔越九日甲戌孝子奎敢昭告于顯考雍逸處士奎罪積不孝昨遭酷罰曾未旬浹便為神柩所棄慈顏笑貌永隔泉壤抱恨終天曷其有極惟是平生潛善懿德所以行於躬教

於家仁於鄉閭而信於士君子者不敢有所隱沒弗傳以貽不仁之罪是用夙夜不寧圖所以為不朽之託去年冬嘗屬親舊盧公武創造行狀請于遂昌鄭明德先生撰為埋銘矣今年春首江西儒學提舉鐵崖楊先生又為論次墓碣一通而浙江行省都事錢公伯行為篆其額既礮石復得江浙儒學副提舉余公士平書之而同里朱珪伯盛刻焉庶幾有以闡發幽潛明著久遠使子子孫孫勸學脩行以無忘我顯考成立啟佑垂裕永世

之意奎不勝大願刻石既成即當樹立墓上竊恐軍旅往來守護弗嚴或有損壞且於家中安奉候事平樹立謹因日至啟奠以告尚冀恩靈俯垂鑒照敢告

為家君禪祭大父祝文

維至正十七年歲在丁酉閏九月壬寅朔廿九日庚午孝子某敢昭告于顯考柏堂處士府君伏以中秋而禪實主漢儒之言閏月而祥爰用晉人之議蓋疑禮從私情所厚而凶事以遠日為先茲服制之有終惟孝思之

罔極變除唯謹哀慕不寧敢以潔牲柔毛粢盛醴齊祇薦禪事尚享

冬至祀先祝文

維洪武五年歲次壬子十一月甲辰朔十八日辛酉孝孫西安府咸陽縣儒學教諭奎敢昭告于顯祖考柏堂府君妣邢氏孺人顯考雍逸處士府君烏乎所貴乎有子孫者以其生也能具甘旨候寒溫歿也能奉祭祀守墳墓而已耳為人子孫而使其祭祀不得躬奉其墳墓不

得躬守而甘旨寒溫之養其生者亦不得而具且侯也  
則與彼之無人焉為之後者何以異哉奎生四十有二  
年矣昏悞荒凡無所肖似不能力學敏行早有所成就  
以貽父母令名又不能見幾先慮深自晦迹自食其力  
營魚鱸之祭祀菽水之養以代斗升之祿而出蹈危機置  
身數千里外使垂白之母朝夕倚門望思而悲泣而祖  
禰春秋之祭祀松楸之展省缺然不親事者已再涉歲  
寒于茲矣不孝之罪其何以逃惟有保身厲志期遠悔

尤苟延歲月幸得還歸故里以養以祭以贖前愆以終  
為人子孫之職分其或庶可自勉耳茲因冬至之節謹  
於所居官舍聊具酒肴之奠菲薄簡略不能如儀無任  
惶恐之至伏地哽咽尚祈鑒享敢告

除夕祀先祝文

壬子之歲除於今夕藐孤小子遠此為羈家薦常儀不  
獲執事謹於所寓官舍具酒脯之奠伏惟祖禰臨之在  
上是歆是嗜綏而佑之謹告



清明祀先祝文

奎違去墳墓再涉冬春夙夜靡寧怛焉如疾對茲令節  
追想平生百感交并不勝永慕謹於所寓官舍具清酌  
寒食之奠身單祿薄不能如儀無任恐悚悲戀之至尚  
享

夏至祀先祝文

維洪武七年歲次甲寅五月丙寅朔四日己巳夏至

云

云  
烏乎宗祀莫嚴於躬奉鬼節莫重於夏至奎幸以眇

身忝承小宗于兩世而不孝無似無能闡發先猷光昭  
積慶以守春秋之事而遠處數千里之外三違夏至之  
奠雖以託之介弟而心終缺然儻蒙昭佑早遂南旋即  
奉秋祭不勝大幸謹於所居官舍奠茲清酌以告所愆  
尚享

祈雨告馬冢龍王文

土地塙燥民物彫劫雍之諸縣蓋莫咸陽若也一遇旱  
暵則束手無措飢餓轉徙而莫之卹也今茲農事方殷

而雨不遂降宿麥將就槁而秋田尤不可以墾闢也吏  
民相視控告無所是用請命于神以寬我吏責續我民  
食也夫神司民命然民乃神主而吏則民役也民或失  
所則神且乏享不獨有司廢職也民能事神神當不棄  
民苟斡旋陰陽時降甘澤俾民免於飢而吏與蒙貺則  
戴神之功永永無數也

六月廿三日祈雨告龍王文

惟神潛靈清渭宅是奧區克庥于人以有廟祀今茲大

旱蟲蟲如焚為虐已甚陰雲纔合暴風簸揚隨輒解散  
穀將盡槁民且乏食賦稅百役其何以供有司震懼罔  
所用力並走羣望未獲嘉應惟爾有神民所敬祀有司  
不職無能媚神百姓可念宜蒙矜恤是用奔走告急于  
神神尚有知俯垂顯貺

咸陽縣禱雨文

嘗謂神以民為主民以食為天無食則民受其飢無民  
則神乏其享休戚所係幽明不殊竊見本縣民庶凋疲

原陸高燥苟雨暘之失節即飢餒之可憂今者宿麥方  
秀待雨而實秋田當種待雨而耕而歷月踰時漸成旱  
勢麥之秀者日就於槁田之種者日愆厥期吏民惶惶  
並走羣望精誠未孚報不時至暴風簸揚雲合輒解是  
用震懼請命于神傳曰有功於民則祀之有勞於國則  
祀之能捍大災則祀之能禦大患則祀之山川丘陵能  
出雲為風雨皆曰神非此族也不在祀典今國家崇奉  
爾神有司春秋致祭固以神能為民捍災禦患有功有

勞也神既昭受其命祀則斯民之灾患不宜坐視而不  
卹也敢告無悔怒無棄民俾即降霈澤永膺祀典無作  
神羞

咸陽蜡祭祝文

維年月日某官敢昭告于昆蟲之神曰昆蟲之祭列于八  
蜡為田穰害繫人是賴疇昔之歲蝗蝻孔繁遺種于螽  
民食用殫施于今春載育載產蒙神之休田用無患爰  
稽古始典祀所通作廟設主吉土是攻堂室靜深牲酒

芳潔落以告成以顯于烈蠶永不作年永順成民永報  
祀神則有稱

祀諸陵祝文

文王

不顯之德允文之功克燕天人爰及無窮惟今天子統  
承前烈永懷山陵典祀斯設秋仲初吉守臣侍祠仁靈  
在天尚右享之

武王

出民塗炭其烈桓桓顯名達孝永世不刊皇有天下統  
承前烈爰勅守臣侍祠陵闕

成王

文昭武烈允明克定重光載宣四方以靖皇有天下統  
承前烈爰勅守臣侍祠陵闕

康王

繼明三后垂拱仰成息民厚俗致治太平皇有天下統  
承前烈爰勅守臣侍祠陵闕



宣王

常德立武任賢使能聲靈赫然撥亂中興皇有天下統  
承前烈爰勅守臣侍祠陵闕

漢高帝

宏規大度威靈赫奕掃除煩苛民以寧壹皇有天下統  
承前烈爰勅守臣侍祠陵闕

景帝

節儉之德允光前王述志守業配美成康皇有天下統

承前烈爰勅守臣侍祠陵闕

咸陽縣祭風雲雷雨師祝文

造化萬物著迹兩間動之散之以行以施玄功莫測美  
利難名昭報之儀實遵祀典

咸陽縣祭山川祝文

涵靈澧渭積陰丘陵出風為雨澤我民生某等敬為神  
主爰報爰祈望祠封內禮典則宜

崑山祭婁侯廟祝文

烏乎漢室之衰海寓鼎沸操丕濟惡攘竊神器孫氏君  
臣保有江東不污漢賊足為世雄其臣謂誰文武子布  
正色立朝吳之仲父寥寥陸侯社稷之臣匡世弭難憂  
國沒身迭封于婁食邑萬戶揚武嗣爵世君此土定國  
捍患典祀有常矧茲故封民思未忘忠臣之祭國有明  
詔乃相舊邑作此新廟三侯同堂有筵有床位侑惟序  
冕黻有章婁人聚觀鼓舞悅喜報事始今有引無替潔  
茲牲酒落以告成敢徼神惠福我民生

表箋

崑山縣謝免秋糧表箋

上位表

五百里甸采首頒寬大之詔書三千年河清快覩聖神  
之御位置郵所被鼓舞惟均

中賀

武定革夏之功文紹

帝王之統克勤克儉未嘗以一已輕用天下之財惟明  
惟聰益將為萬年永固邦家之本爰除農賦以厚民生  
且周人不稅止及於私田而漢代賜租僅行於中葉豈

若盡蠲其常貢即於創造之初年歡聲騰兩浙之間甘  
澤自九霄而下非常之幸莫得而名臣某等承乏縣廷  
歸誠宸陛田耕井飲願同擊壤以興歌地久天長罔既  
呼山而獻壽

中宮箋

三代攸興咸本始基之教十臣為治尤資內助之功恩  
出宮庭澤流田里中賀揚輝陰載冠德柔儀夙夜儉勤  
克廣素風於大練春秋灌獻祇承清廟之豐盛方賜租

咸仰於聖明實創業相成於警戒鳶魚遂性草木涵仁  
臣某等幸忝微臣虔伸善頌神州赤縣屢書大有之年  
長樂未央永享太平之福

東宮箋

漢勸農功誕下十行之詔周陳王業載歌七月之詩本

正萬邦運昌千載

中賀

龍姿秀毓麟趾仁歸主宅四時

久奉榮盛之設陪耕千畝夙知稼穡之勤陰賜在人陽  
和溥物遂將順於廟筭肆蠲免其田租恩翔祥風澤滂

甘雨臣某等備員畿縣仰德宮庭幸與扶藜快覩太平之盛事願同蔓草長承繼照之餘輝

聖節表

太倉  
銜進

景運開天黃河清而聖人出大明麗日玉衡正而泰階平慶紀虹流歡騰鼇抃中賀性全上智仁覆羣黎旋乾轉坤功合生成之妙經文緯武統承華夏之尊壽域永躋熙辰同樂臣某等剖符環衛荷甲海城聲呼萬歲者三遙效嵩神之祝福錫九疇之五願申箕子之謨

聖節表

宋國公總  
兵甘肅賀

以火德王天下交龍開受命之符生聖人主中原夾馬  
紀發祥之迹凡居涵育靡不尊親中賀欽惟道合上玄  
統傳前聖治功永定迺緯武而經文德教大行方敷風  
而厚俗當金顥高秋之序是黃河清日之期昭代熙辰  
太平盛典臣某任先授略賀後趨班萬里玉門瞻天威  
於咫尺千屯沙幕祝聖壽之再三

賀冬至表箋

陝西行  
省進



上位表

五雲捧日高臨亞歲之朝萬景融春不應初陽之候祥  
浮寓縣喜溢臣鄰盛德享天宏功作聖安攘內外協兩  
儀生物之仁統壹朔南冠千古開基之烈信備膺於多  
福庸茂對於熙辰臣某等分陝叨恩呼嵩効敬大庭廣  
樂希聲遙聽於黃鐘昭代昌符順序永調於玉燭

中宮箋

紫庭聽治式開正始之基華琯呈祥允協尊陽之操春

浮威苑輝映宗藩女德皇英母儀妊姒性全貞淑重歌  
窈窕之篇助賴儉勤同享綿延之祚昌辰在候盛禮傳  
臚臣某等叨任外垣阻趨中掖玉卮稱壽小星莫綴於  
朝班彤史流芳長日喜添於宮線

東宮箋

青臺雲近肇開五色之祥黃道日長咸仰重明之運宮  
闈交賀朝野均驩龍德天成鳳姿山立早緝熙於聖學  
性與春融方參贊於帝謨道隨陽長集王公而獻履就

君父以稱觴臣某等喜躍一隅誠馳雙闕吹笙仙苑律  
諧玉琯之和音簇仗臚庭輝映畫堂之佳氣

聖節表

電彩虹輝協昌符於昭代天長地久開壽域於熙辰近  
古今儀太平盛典

中賀

欽惟堯天則大湯日加新經文

緯武之功式資玄造內聖外王之學實本生知盛德在  
躬至仁及物和氣甘凝於碧露嘉祥清見於黃河縉禮  
斯成淳風惟永臣某等忝官西縣望拜南京聲呼萬歲

者三遠效登嵩之祝福錫九疇之五敬徵出洛之書

千秋節箋

華月方恒快觀前星之麗彩璿源正衍普沾幼海之涵  
波朝野榮觀邦家盛際中賀恭惟溫良成性仁敬積躬  
經緯人文天地密資於參贊緝熙帝學聖賢親見於謀

謨

強齋集卷五